

Tatou pauroa tei amui mai i teie poipoi api, ia maitai tatou i roto i te aroha o te Tumu nui.

Hou a haamatahia ai teie vauvauraa manaò te hinaaro nei au e faahaehaa ia ù i mua i teie mau aito tei tià mai i roto i teie apooraa iriti ture i te tau o te mau hau tiàma huiarii maohi mai i te mau raatira, te mau tavana atoà, ratou tei ore a to ratou ioa i papâi hia i nià i te paruai.

O ta ù ia e tiàturi nei e na teie Peretiteni o tatou e faatitiaifaro i te reira.

Ratou i faòti i te mau ture maohi, ratou i imi i te raveà e faatuàti te mau ture maohi e te mau ture no rapae mai te aita.

Ratou atoà tei faaòre i te utuà haapoheraa taata i te matahiti 1824. Ia faahaamanaò hia to ratou parau.

Haamaururu taaê to ù i te Orometua faatura o Sylvia a RICHAUD, oia tei ani mai ia faatere hia te tahi haapiiraa ture na roto i te reo maohi a 8 matahiti i teie nei, i te fare haapiiraa papa toru.

Maururu atoà ia Mirose PAIA e o Jacques VERNAUDON tei òromai ia tapeà noa hia teie haapiiraa tei topa hia te iòà "*Ture maohi*".

TETUNAE TE ARII FAATURE

Ua hiò mai tatou i te parau a TETUNAE na roto ia Bruno SAURA e teie paha te tahi uiraa e fa mai na roto ia tatou.

Te mana noa anei ra teie mau ture a TETUNAE i teie mahana?

E faufaa anei to teie mau ture i teie mahana?

Hou tatou a hiò mai te mau ture a Tetunaè, e tano paha e tatara na mua roa teie parau ture maohi.

Aita e ore e huru ê tatou ia faahiti hia teie parau no te mea matau noa tatou i te haamaòhi i te puaa aore ra te meia aore ra te uru.

Ia parau anaè hia ra i te ture e maòhi. Maèè rii tatou.

Ua rau ra te mau hiòraa e faaite nei ia tatou e ture to te maohi mai te tau o te mau hau maohi tiàma e tae noa atu te taime i aiharu hia to tatou âià e te hau farani.

A - TE TURE MAOHI

1 - E aha te ture :

Eere teie taò i te taò maohi, mea hamanihia e te mau mitionare porotetani.

No roto mai i te taò Torah oia hoì te parau a te Atua, ia au te ati uta. Aita ra te taò tora aore ra tore i farii hia no te mea mea faufau ia au te teteraraa a John Mairai tane, i riro mai ai ei ture.

E aha te ture?

O te hoê ia faaueraa i te taata ia rave i te tahi ohipa:

"Ia faatura te tamarii i to na metua tane e to na metua vahine", irava. 371-1 o te Puta Ture tivira farani;

Aore ra ia haapae i te rave:

"Eiaha roa oe e taparahi noa i te taata", Etoto Pene 20, Irava 13.

E ia ore te taata e haapaò i teie faaueraa e topa hia o na i te e utuà.

Ua rau te mau faautuàraa:

E utuà moni ta te tamarii tei ore i faatura i to na metua, e e utuà fare tapeàraa to te taata taparahi taata, utuà pohe i te matamua.

2 - E aha te maohi :

Te na o mai ra te faatoro reo maohi o Davies : *"common, native, not foreign"*, oia hoì no te fenua, eere no rapae mai.

3 – E ture anei to te maohi?

Mai te peu eere te ture i te taò maohi, tano anei e parau e ture maohi ? Aore ra e ture anei to te maohi ?

I te tau a te mau hau maohi tiàma, aita te parau no te ture maohi i riro ei tumu parau parauraa.

No te mea tera anaè te haapaòraa ta te maohi i ite, o ona iho.

I te tae raa mai ra te mau papaa e te mau mitionare ihoa ra, i reira to na ite raa e te vai ra te tahi atu mau faatureraa mai te mau ture peretane e te ture a te Atua (ture 10), tei taaè i ta na.

Teie ia faanahoraa ta Vaita i tohu mai:

"E mou teie ha'apaora'a tahito nei, e e tae mai ho'i te manu mo'a o te moana, e te fenua nei. e haere mai e ta'iha'a i ta teie ra'au i motu e ha'api'i nei" (TH Tahiti i mua ra).

Ua fa mai te manao o te ture maohi na roto i te faatitoraa hia te mau ture o te fenua e te mau ture no rapae mai.

Ia ui hia e ture anei to te maohi oia hoì hou te mau ture no rapae mai i te haamauraa hia io tatou, mai te huru atoà ra e te ani hia ra e atua anei to te maohi hou te mau mitionare peretane, te mau manu moà ta Vaita i tohu i te taeraa mai io tatou.

Te pahonoraa i vai noa na te Atua io tatou hou te mau mitionare. E ture atoà to te maohi. Aita ra e taò no te parau i mau faaueraa ture no te mea e iòà to te ture.

E tapu, e rahui, e taimara etva...

No te haapapu i te manaò ua mana ihoa te ture maohi, e piti hiòraa e tano ia tutonuhia:

1 - te hiòraa matamua, tei roto ia te parau tutuu ta Pomare V i tuurima i te 29 no tiunu 1880.

Power point n° 1: Te parau tutuu a Pomare V

"Te ani nei matou i teie hau fenua faahiahia mau e ia faatere maite oia i to matou nunaa ma te haapaò i te mau ture e te mau peu tumu maohi".

Teie mau parau, ua piahia i roto i te veà a te hau farani.

2 - te piti o te hiòraa tei roto ia i te veà a hau no te mau haapaòraa farani i Oteania.

Power point n° 2: Ture maohi no te mau fenua i raro

Na te faataaraa a te Tavana rahi o te 27 no atopa 1898 e haamana i te puta o te mau ture maohi no te mau fenua i raro.

Te na o ra te irava piti e rave hia te mau ohipa haavaraa i nià i te taata maohi mai te matamua ra te huru.

Power point n° 3: Irava 2

Te papu ra ia tatou i teie nei, e ture ihoa to te maohi e o TETUNAE te arii matamua tei haaputuputu i te mau ture maohi.

B - TE MAU TURE A TETUNAE

E piti huru ture ta na i haamau: te mau ture no te mau taata atoà e te mau ture no te mau arii.

1 - Te mau ture no te mau taata atoà

Ua mau ia tatou teie parau *"Ia ite oe i te taata ia haere, a pii atu tipae mai, haere mai e tamaa"*.

Ua paò roa tatou i teie parau tei roto roa i to tatou ADN, i pii hia ai tatou e nunaa farii.

I teie mahana ua riro te fariiraa ratere *"E peu tumu no to taua aia"* ia au te parau faatiani o te mau matahiti 1990.

Eere anei e ture, oia hoi te ture no te farii i te taata maohi anei aore ra te mau ratere.

Na Tetunae teie ture i haamau e tei mau aau roa hia ia tatou i teie nei.

Ua moè ra ia tatou e ture maohi teie no roto mai i teie arii. Auaè te mau pehepehe a Henri HIRO i ite faahou ai tatou e na Tetunae teie mau ture.

"O TETUNAE te arii nui tei faanahoe tei faatura i te hoê arataïraa no te oraraa o te maohi, i nià i te papa ra o te farii raa taata."

E ture, auraro, e haapaò, e faatura".

Teie te parau a TETUNAE, ia au te papairaa a Ernest SALMON e ia au i te faaiteraa a to na metua vahine o MaurauTaaroa SALMON, te tamahine a Ariitaimai raua o Tati raatira na Pomare, e tei haaipoipo ia POMARE V.

No roto mai teie mau parau i te mau fetii huiarii no ômii o te ià.

Tei roto oia i te piti o te tuhaa oia hoì te mau ture e au no te mau taata atoà.

Power point n° 4: Te ture 11 a TETUNAE

"Eiaha oe e hio mata noa i te taata e haere na to pae fare mai te pii ore atu e a tapae e tamaa.

Eiaha ta oe ei maa pahapa i te mau utuafare fatata ia oe.

Eiaha oe e hiò ino i te taata ratere i na to pae fare te haere e pii oe ia na e tapae mai, e tupai oe i ta oe puua ia hinu a ta oe umete i te maa faaàti atu ia na.

Te taata atoà o tei ore i faatura i teie nei faaueraa, ia afaì hia ia oia i te vahi atea faahaama atu ai ia ore taua hara ra ia haamoè hia.

E tià noa i te arii i te amu i tana fenua ei utuà".

I roto i teie irava, te ite nei tatou i te mau tatararaa a te ture:

E faaueraa haapae "*eiaha oe e mata noa*";

E faaueraa faahapo "*e tupai oe i ta oe puua*";

E utuà i nià i te taata "*afaì i te vahi atea*";

E utuà faanavaì i nià i te faufaa o te taata "*amu te arii i ta na fenua*", ia au i te hinaaro o te Arii.

Te ite atoà ra tatou e teie ture no te mau "*taata atoà*" ia au ihoa ia i te aratairaa o te piti o te tuhaa oia hoì te mau ture no te taatoàraa.

E ite tatou i te reira i te irava ture matamua o teie tuhaa.

Power point n° 5: Te ture 1 a TETUNAE

"E faatura te taata atoà i te Arii i ta na huaai e to na fetii, ia moà te arii mai te atua ra, e huaai oia na te Atua".

I roto i teie tuhaa o te puta ture maohi a Tetunae, ua faataa oia te mau faaueraa atoà tei haapapu i te tiàraa o te mau taata e mana to ratou, mai te mau arii, te mau tahuà, te mau Hiva o Hoomatavana, e te mau Taumihau oia hoì te mau faatere o te hau.

Te haapapu atoà oia i te hiòraa maohi o te fenua e te âià, "*te metua i fanau ia outou*" (Irava 5).

Te haamanao atoà ia tatou ia rave amui hia te ohipa no te paturaa fare: "*Ia amui te taata atoà i te tomoraa i te raufara no te peue vauvau, i te tapoà o te fare e te ripo o te fare*" (Irava 10).

I roto i teie tuhaa e ite hia te parau no te "*mahana pureraa marae e mahana moà*" (Irava 14).

E te irava hopeà teie e haapapu ra:

"Ia vai moà te mau rahui o te arii o tei ofati i te reira faataaraa ra o te pohe ta na utuà" (Irava 17).

Ua rau te mau rahui i nià i te mau faufaa o te moana mai te âua ià anei aore ra te mau rahui i nià i te fenua mai te mau faapu haari e o ta te irava ture 2111-1 o te puta ture Arutaimareva e haapapu faahou ra i teie mahana.

Art. LP. 2122-1

Le Rahui est un espace terrestre et/ou marin sur lequel des règles non écrites dictées par un impératif de gestion des ressources sont appliquées de manière traditionnelle. Ces règles, portant restriction ou défense d'exploiter une ou des ressources naturelles ou cultivées pour une période déterminée et une zone délimitée, permettent aux ressources considérées de se reconstituer et d'être suffisantes quand le Rahui est levé.

Toe noa ia haamana hia te utuà ia tura noa hia te rahui.

2 - Te mau ture no te Arii

Power point n° 6: Ture 1 a TETUNAE

"Mai ia Taùrua horopoipoi ra oe. E noho oe i te ihu o te vaa nui ra". Te faaite ra teie irava matamua e e hiòraa te arii no te nunaa, tei riro atoà e aratai mai te fetià e, e ei faahoro.

Na teie mau ture e haapapu i te tiàraa o te arii, te tura e te hanahana.

Teie ra, ua riro atoà teie mau ture ei raveà no te faaiti i te tiàmaraa o te arii, eiaha oia ia rave noa i nià i to na manaò.

Aita ra to teie mau ture e utuà. Tei te nunaa ia te utuà oia hoì te utuà na roto i te faatupu orurehau mai ta Terehe i rave i tera ra tau.

Te faahiti ra te ture 20 e tià e feruri e parauparau hou a faoti ai, eiaha e rave iria noa te ohipa.

E faanaho atoà teie mau ture i te oraraa o te Arii, mea na hea e haapaò e aupuru i to na tino, ta na utuafare e tae noa atu i te feia e taturu ra ia na.

I te pae o te tino, te faaite ra te ture te maa e au i te arii ia amu mai te ouma e te papaùru o te puaa, ia maitaì noa o na.

I te pae o te utuafare, o vai te taata aita e tano e farii, mai te arero peepee e te maro parau to ratou.

E faara atoà o TETUNAE eiaha ia haaviivii i te toto, oia hoi eiaha e faaea i te manahune e hiò maitai te vahine e tano.

I te pae o te faaroo te faahoì ra o TETUNAE i te arii i te marae FAREPUA oia hoi te marae ta na i faatià i Vaiari o Papeari i teie nei.

Te vai atoà ra te tahi mau arataìraa i nià i te huru faatereraa e tià e ma te faara atoà eiaha e horoà noa i te tarià i te feia hotu paenu (Ir. 31) aore ra ia parau oia e "*Te paari e te aau hau ta te arii omore maitai ia tapea*" (Ir. 27).

No te puòhu i teie tuhaa te faahoì ra o Tetunae i te parau ia Taurua: "*I tura ta oe tapu mai to oe tino i tura ra. Ei parau mau ta oe, mai te haerea mai o Taurua Horopoipoi i te aahiata ra te papu, e mau etaeta te fero raa mai te ture i Farepua*" (Ir. 39).

Puòhuraa:

I teie mahana, aita teie mau ture e mana faahou no te mea ua mou.

I te mahana a horoà ai te arii Pomare V i to na fenua i te hau farani, riro mai ai ei fenua farani, ua faaòre hia teie mau ture.

Maoti teie faanahoraa aiharuraa fenua, ua mau noa ra teie mau ture i roto ia tatou. E mai te mea te vai rii noa ra, tapaò te reira teie te ture e tano no tatou.

E ia hiò tatou te huru o te maohi i teie tau, e tano paha ia faahiroà faahou teie mau ture i roto ia tatou e taata tai tahi e tae noa atu ia outou te feia faatere.

No te mea i teie mahana aita e huiarii faahou aore ra tatou paatoà e arii anaè tatou, te vai noa ra te mau faatere. E tano ia outou e tipae mai e tau mai i roto i teie mau ture ia tura faahou te tiàraa arataì.

I teie mau tau fifi i roto i te oraraa, paenu te taata io na iho, aita e hiroà faahou i mua i te raau taero anei, e tano paha e hoi faahou i roto i teie mau ture. Hau atu a e tano e papaì ta tatou mau ture na roto i to tatou reo e ia piahia na roto i te roro uira.

O te ohipa ia te haamata hia i te rave i te faatereraa o te fenua na roto i te huriraa i te papa ture otonomi na roto i te reo maohi e te haaparareraa i te ture na roto ia lexpòl i au te faotiraa a te Peretiteni Moetai BROTHERSON.

Ia ite faahou oe e te maohi e ture to oe, mai mua mai, e hanahana to oe, taime tano paha teie no te hiò faahou ia oe i roto i to oe tura, ia teoteo e ia faahinaaro faahou oe ia oe iho.

MaururuPhilippe

T. NEUFFER (Papeete, 3/06/2025)